



# KINSCHTLER 2008



S fliegt mer d Kappe ewägg und s wird mer sturm,  
uff em Kasärneplatz in däm Sässeliduurm.  
Dä schrubbt sich in d Heechi verzell ych dr Frau,  
jä saag:...isch das scho dä Roche-Neybau!

In Istanbul dr sportlig Lohn,  
fir e Huggel numme Spott und Hohn.  
Nach dr EM-Zueloosig gege Diirgge im 08,  
het sich dr Huggel uff e Wääg in Krafruuum gmacht.

Nur no Gäld verdiene isch e Zyyt,  
fir d Aktionäre megligscht vyyt.  
Mit krampfe wirtsch bi uns nit ryych,  
worum isch das im Groosroot nit glyych?

Dr Peperoni hets gsunge, und alles het glacht,  
dass d Barbara Schneider wissi wie me Äärdbeebe macht.  
Nach ihrem Ruggdritt haa ych mir iberleggt,  
wäär in unserer Regierig in Zuekunft no ebbis bewegt.

Dr Vatikan duet em Franz Sabo schryybe,  
bisch yglade zem e weeneli bi uns z blyybe.  
Ych kum gärn, aber nur mit em Koch an dr Laine,  
nai dangerscheen mir hän sälber aine.

Alles uusegstaubt, vo Motte befreit,  
die alte Deppig und Meebel uusegheit.  
D Villa Kunterbunt läär bis uff e Kaffikoche,  
Staubsuuger, Fluumer jä und wo isch dr Blocher?

Mit 20ig bisch no voll im Saft,  
mit 40ig zwyflisch an dr Vaterschaft.  
Mit 60ig bstellsch dr 2er in dr Garaffe,  
und ab 80ig derfsch uffheere schaffe.

An d EM 08 geen mer, gäll Du au,  
sag ych zer Ex-Frindyyn s isch hitte my Frau.  
Sit däm Gool vom Petric macht si e Lätsch  
und meint: ooni Beckham chasch elai an d Mätsch.

S isch dr Schacherseppeli dr greschti Hit im Land,  
die steerggschti Partei isch d SVP das liggt jo uf dr Hand.  
Als Mannchaft spielt dr FCB bis Saisonhelfti formitabel,  
Dr Ospel griegt dr Bänggerbryys fir dr greschti Schnaabel!

E Fondue-Chalet in dr Stadt,  
Dänggmoolpflägg findet s gar nit glatt.  
S git scho gnueg so Seych vo dääre Sorte,  
isch do d Rächnig ooni Wirt gmacht worde.

Dr Sarkosy isch in aller Munde, nadyrlyg ganz glaar dr Maa der Stunde.  
D Wahlzzyt haltet är yy das wär doch glacht,  
s isch doch d Bruni wo jetze Muusig macht.

Im „Trois Rois“ ässt me gsundi Koscht,  
nur mit em dyrschte Wyy machsch broscht.  
Wo s Ässe kunnt due ych uff e Däller stiere  
und froog: Herr Ober isch das zem probiere?

D Fuessball EM wär lieber scho verbyy,  
d UEFA mischt sich bi jedem Schissdrägg dryy.  
Statt Klepfer mit Brot und s Bier vo uns,  
gits Bockwuurscht, Sämmel und Hopfe-Brunz.

Als AMI hesch e Bush Neyrose,  
bisch Russ muesch uf dr Putin loose.  
Wenn de Schwoob muesch sy denn isch das dimmer,  
nur Ziircher syy isch no vyyt vyyt schlimmer.

Mir windsche Eych bis in alli Nacht,  
nur Fasnachtsdääg wo s pfiift und gracht.  
Mir saage Aadie und no vyyle Dangg,  
dr Kinschtler Eyre Schnitzelbangg.

---

Wotts au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---

Drugg: H. Leidenfrost AG Basel